

**UPA2019-imut malittarisassat atuutsinnerini ersarinnerusumik aammalu  
aalajangersimanerunissamik Namminersorlutik Oqartussat pigisaanni taamatullu  
suliffeqarfinni pigisat ilaanniittuni siulersuisunik ilaasortaatitaqartuni  
akissarsitinneqartarnerat pillugu politikikkut malittarisassanik aaqquissuussinermi  
Naalakkersuisut peqquneqarnissaannik Inatsisartut aalajangiiffigisassaattut  
siunnersuut  
(Partii Naleraq)**

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutit aappassaaneerreqarnerinut**

**ISUMALIUTISSIISSUTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Hermann Berthelsen, Siumut, siulittaasoq  
Inatsisartunut ilaasortaq Peter Olsen, Inuit Ataqtigiit, siulittaasup tullia  
Inatsisartunut ilaasortaq Karl-Kristian Kruse, Siumut  
Inatsisartunut ilaasortaq Henrik Fleischer, Siumut  
Inatsisartunut ilaasortaq Múte Bourup Egede, Inuit Ataqtigiit  
Inatsisartunut ilaasortaq Malene V. Rasmussen, Demokraatit  
Inatsisartunut ilaasortaq Jens NapátôK', Partii Naleraq

Ulloq 2. oktober siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Ilaatigut akissarsianik piumallerlunilu qaffaasarnissat, tassungalu ilanngullugu akissarsiat naalakkersuinikkut sulinermi kammalaatinut iluaqutissarsissutissatut nunanit tamalaanit isigineqarsinnaanerit aammalu inatsisinik atuuttunik unioqqutitsisinnaanerit pinngitsoortin- niarnerat siunnersuuteqarnermini siunnersuuteqartup kissaatigaa. Taamaattumillu akissarsia- qartitsinermut politikeqarneq maleruagassiuunneqassasoq siunnersuuteqartup kissaatigaa.

**2. Siunnersuutip Inatsisartunit siullermeerneqarnera**

Siunnersuut siullermeerinninnermi Inatsisartunit amerlanerussuteqartunit taparserneqarpoq. Aappassaaneerinninnermullu allanguutissatut siunnersuuteqarnissaq siunnersuuteqartup pisa- riaqartissimavaa, tassa siunnersuutissatut kissaatigineqartoq 2019-imi ukiakkut ataatsimiin- nermi Naalakkersuisunit saqqummiunneqarsinnaasimangimmat.

### 3. Ataatsimiititaliap siunnersuummik suliarinninnera

Akissarsiaqartitsinermi politiki ullutsinnut naleqquttuussasoq, tassanilu akissarsiat amerlassusissaat akisussaaffimmik sulinikkullu tunniussanut ersersitsisuussasut kiisalu piginnaasat ingerlatseqatigiiffiit siulersuisuini pisariaqartinneqartut pissarsiarineqarnissaannut akissarsiaqartitsinermi politikikkut tapersersorneqassasut isumaqatigiissutigineqartoq ataatsimiititaliamit aallarniutigalugu oqaatigineqassaaq. Siulersuisut immikkut ilisimasallit pissarsiarineqarnissaannut akissarsiaqartitsinermi politikip aamma peqataaqataanissaanik siunnersuuteqartup kissaateqarnera aamma akerlerineqanngilaq. Akissarsiaqartitsinermi politikip ammasuunissaa paasiuminartuunissaalu aammalu atorsinnaassuseqartuunissaa nalinginnaasumik isumaqatigiiffiuvoq.

Ataatsimiititaliap paasinninnera malillugu siunnersuuteqartoq isumaqarpoq akissarsiaqartitsinermi politikikertik Naalakkersuisut aalajangersimasumik paasinartumillu ingerlatinngikkaat. Kalaallit Airports A/S-imi siulersuisunut siulittaasup akissarsiaqartitaanera siunnersuuteqartup assersuutitut taavaa aammalu Kalaallit Airports A/S-mi siulersuisunik akissarsiaqartitsineq pillugu § 37 naapertorlugu apeqqutini nr. 2019/31 innersuussutigalugu.

Aalajangersimasumik naliliineq tunngavigalugu Kalaallit Airports A/S-imi siulersuisunut siulittaasup akissarsiai qaffanneqassasut Naalakkersuisunit aalajangiunneqarsimasoq Naalakkersuisut akissuteqaamminni paasissutissiissutigaa. Taamatut periuseqarneq akissarsiaqartitsinermik politikimik aaqqissuussineq nutaamik 2014-imeersumik Naalakkersuisut paasinnerattut ataatsimiititaliamit isigineqarpoq, tamatumani akissarsiat akisussaaffik, saqqumilaarneq sulinikkullu tunniussat ataatsimut isigalugit annertussusilerneqartarlutik. Tamanna tikillugu akissarsianut apeqqutaasimapput ingerlatseqatigiiffiit kaaviiartitaat. Taamatut oqaasertaliineq aalajangersimannigitsutut, paasiuminaatsutut, erseqqinngitsutut allatigulluunniit aqtsivigiuminaatsutut ataatsimiititaliamit isigineqarpoq. Taamatut oqaasertaliinikkut "aalajangersimasumik naliliineq" tunngavigerpiarlugu Namminersorlutik Oqartussat ingerlatseqatigiiffiutaanni assigiinngitsuni akissarsianik aalajangersaanissamut Naalakkersuisunut anneruumik periarfissinneqarput. Akisussaaffik aammalu sulinikkut tunniussat akissarsiaqartitsinermi politikikkut ersersinneqarlutillu taanna piginnaasanik, ingerlatseqatigiiffimmit pisariaqartinneqartunik, pissarsiniarnermut tapertaassappat ataatsimiititaliap isumaa malillugu ingerlatseqatigiiffinni Namminersorlutik Oqartussanit pigineqartuni assigiinngitsuni siulersuisunut tamanut paasiuminartuusariaqarpoq. Akissarsiaqartitsinermik politikimik, ataatsimut isigalugu akisussaaffimmut, saqqumilaarnermut sulinikkullu tunniussinermut sanilliullugu paasiuminarnerpaamik Naalakkersuisut qanoq aqtsilersaarnerannik paasinarsisitsinissaaq aaatsimiititaliap isumaa malillugu siunissami pisariaqartinneqarpoq.

Tassunga atatillugu ataatsimiititaliamit oqaatigineqassaaq Kalaallit Airports A/S-imi siulersuisunut siulittaasup akissarsiaqartinneqarnera akissarsiaritinneqartartunik, akissarsiaqartitsineq pillugu Naalakkersuisut politikerisaanni kingullermi 2014-imeersumi aalajangersarneqaraluartunik, marlutsigut qaangeerujussuarpoq. Siullermik akissarsiat 750.000 kr.-iusut

manna tikillugu akissarsiaritinneqartartunik 50 %-inik qaangiineruvoq. Taakku tassaasimapput Royal Greenland A/S-imi, piffissap taamaalinerani ukiumut 5 mia. kr.-it sinnerlugit kaaviiartaartartumi, siulersuisunut siulittaasup akissarsiai. Aappaattut Naalackersuisut akissarsiaqartitsinermi politikiani kingullermi allassimavoq siulersuisunut siulittaasut akissarsiaat tassaasut nalinginnaasumik ilaasortat akissarsiaasa 2,5-eriaataa. Kalaallit Airports A/S-imi siulersuisunut siulittaasup akissarsia nalinginnaasumik ilaasortat akissarsiaasa 3,75-eriaatigaat.

Taamaattumillu ataatsimiititaliamit paasilluarneqarsinnaavoq Naalackersuisut akissarsiaqartitsinermit politikerisaata maleruagassiuunneqarnissaa amigaatigineqarpat, tassungalu ilanngullugu maleruagassanik ersarissumik aalajangersimasumillu aqutsinissaq amigaatigineqarpat.

Akissarsiaqartitsinermit politikimi kingullermi 2014-imeersumi siunertaq tassaammat akissarsiat pissusiviusunut naapertuunnerusunngorlugit akissarsisitseriaatsimik aqqissuussinissaq tamatumalu peqatigisaanik akissarsisitsisarnermik politikip ima pisariitsiginissaa paasinar-tumik paasissutissiissutigineqarsinnaalluni. Anguniakkamik tamatuminnga Naalackersuisut qanoq eqquutsisisimanerisa erseqqinnerusumik qulaajaaviginissaa ataatsimiititaliamit amigaa-tigineqarpoq. Pissutsit pissusiviusut suut Naalackersuisunit eqqarsaatigineqarsimappat aam-malu pissutsit pissusiviusut taakku Naalackersuisut aalajangersimasumik naliliineranni qanoq ilillutik tunngavigineqarsimappat. Akissarsiaqartitsinermit politikimik ingerlatseqatigiiffiit aqutsineranni tupaallannartunik pisoqartariaqannginnera ataatsimiititaliaq isumaqarpoq, neriuutiginarporlu Naalackersuisut aamma taama isumaqartut. Kiisalu akissarsianik qaffaaneq naalackersuinikkut mianernartuummat ataatsimiititaliamit Naalackersuisunut eqqaasitsissutigi-neqassaaq, tassami akissarsiarititat taakku inuit nalinginnaasut ukiumut akissarsiaattut annertussuseqarmata.

#### **4. Siunnersuutip aningaasaqarnikkut kingunerisassai**

Siunnersuutip aningaasaqarnikkut allaffissornikkullu kingunerisassaattut siunnersuuteqartup naatsorsuutigisaanut Aningaasaqarnermut Akileraartarnermullu Ataatsimiititaliaq oqaaseqaat-tissaqanngilaq.

#### **5. Ataatsimiititaliap inassuteqaataa**

Siunnersuut amerlanerussuteqarfusoq, taasissutissamili UKA 2019-imut piffissaliussaq eq-quutsinneqarsinnaanngitsoq, ataatsimiititaliamit maluginiarneqarpoq. Inatsisartuni amerlane-russuteqartut inassuteqaataat malitseqartinneqassappata allannguutissatut siunnersuummik, piffissaliussap siuliani taaneqartup 2020-mi upernaakkut ataatsimiinnissamut kinguartinneqar-nissaanik imaqartumik, saqqummiussinissaq pisariaqassaaq.

Tamanna tunngavigalugu **Aningaasaqarnermut Akileraartarnermullu Ataatsimiititaliaq isumaqatigiittoq** allannguutissatut siunnersuummik imaattumik saqqummiussissapput:


**UPA2020-mut malittarisassat atuutsinnerini ersarinnerusumik aammalu aalajanger-simanerunissamik Namminersorlutik Oqartussat pigisaanni taamatullu suliffeqarfinni**

**pigisat ilaanniittuni siulersuisunik ilaasortaatitaqartuni akissarsitinneqartarnerat pillugu politikikkut malittarisassanik aaqqissuussinermi Naalakkersuisut peqquneqarnissaannik Inatsisartut aalajangiiffigisassaattut siunnersuut.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Hermann Berthelsen,  
siulittaasoq



Peter Olsen




Karl Kristian Kruse




Henrik Fleischer



Múte Bourup. Egede



Malene V. Rasmussen



Jens NapátôK'